

IBOKPOT YE IDIŌK MKPASIP

Matthew 13:24-30, 36-43

ŌYŌHŌ UKPEP-ŊKPO 76

Eke Ikpō Owo

IKŌ IBUOT: “Mbufo ebon ikŏt ima Mi enŏ Mi, kpa mmŏ eke ekedade uwa ediomidiomi ye ami” (Psalm 50:5).

I Etŏ Eti Mkpasip Ke Iŋwaŋ

1. Eda Obio-ubŏn Heaven edomo ye ŋke idiŏk mkpasip, Matthew 13:24, 25
2. “Owo” emi akasuande eti mkpasip edi Eyen Owo, Matthew 13:24; 18:11
3. “Iŋwaŋ” emi ekesuande mkpasip edi ererimbot, Matthew 13:24; Psalm 2:8
4. “Eti mkpasip” edi nditŏ Obio-ubŏn Heaven, Matthew 13:24; 13:38; Ŋwed Mbon Rome 8:16

II Etŏ Idiŏk Mkpasip Ke Otu Ibokpot

5. Ekewan idiŏk mkpasip ke ini mme owo ekedede idap (ke spirit), Matthew 13:25; Isaiah 60:2; 1 Ŋwed Thessalonica 5:6
6. “Idiŏk mkpasip” edi nditŏ andidiŏk, Matthew 13:25; 13:38; John 8:44
7. “Owo asua” emi akasuande idiŏk mkpasip edi Satan, Matthew 13:25; 13:39; Ŋwed Mbon Ephesus 6:11

III Edibahare Ke Ini Ukpeŋe

8. “Ini ukpeŋe” edi akpatre ini eyo emi, ndien mbon ukpeŋe edi mme angel, Matthew 13:30; 13:39; Mark 13:27
9. Ikemeke ndidibede idiŏk mkpasip mbak editodo edibede ibokpot ŋko, Matthew 13:28, 29; Utom Mme Apostle 15:14-17
10. Akpatre edibahare edidi ke ini ukpeŋe, Matthew 13:30; 25:31, 32; Daniel 12:2
11. Etaŋ “idiŏk mkpasip” efŏp ke ikaŋ (nsinsi ikaŋ), Matthew 13:30; 13:40-42; 25:41
12. Etaŋ “ibokpot” ekenim ke “ubet udia” Esie (ke Obio-ubŏn Ete mmŏ), Matthew 13:43; Daniel 12:3

SE EKPEPDE EBAŊA

Ŋke ibokpot ye Idiŏk mkpasip, kpa nte ŋke Asuan-mkpasip, edi ŋke emi Ōbŏn akakabarede. Ke ntre inaha nnyin idu ke eyighe ke abaŋa se mmŏ ewŏrŏde. Ke akpa, nnyin ikut ite ke akabaŋa ido nte mme owo edade ebŏ Ikŏ Esie, emi edide ata akpan ŋkpŏ; koro usuŋ ndika ke Obio-ubŏn Heaven esine ke ido nte owo ŏbŏde Ikŏ Abasi. Ndien ŏyŏhŏ ŋke iba otim ekpere enye koro owutde ŋkŏri ke abaŋa Obio-ubŏn onyuŋ ayarare akpatre itie mmŏ oro ekedede “eti isŏn” emi eketŏde Ikŏ Esie ke esit mmŏ.

Eti Mkpasip

“Asuan mkpasip” ke ifet emi, kpa nte ke akpa ŋke, edi Eyen Owo (Matthew 13:37), ndien “iŋwaŋ” emi esuande eti mkpasip edi ererimbot (Matthew 13:38) Enye onyuŋ anam aŋwaŋa nte ke “eti mkpasip” edi nditŏ Obio-ubŏn.

Ntre ke eyarade ke ŋke emi akpan ntak emi akanamde Jesus edi ke ererimbot, kpa nte Simon Peter eketiŋde ŏnŏ mbon esop ke Jerusalem ke ini enye etiŋde ikŏ-ntiense abaŋa se enye okokutde ke ufŏk Cornelius, nte James ekewetde: “Simeon omobuk nte Abasi ekebemde iso edi edise mme Gentile ndisio ikŏt ke otu mmŏ nnŏ enyiŋ Esie” (Utom Mme Apostle 15:14). Edi ke eridi Ōbŏn Jesus Christ, mfŏn erinyaŋa Abasi ama ebe osim Mme Idut. Ke ŋkpŏ nte tŏsin isua iba idahaemi, Eyen Owo ke oyoyom “mme owo osioŋo ŏnŏ Enyiŋ Esie.” Mmŏ emi edi “nditŏ Obio Ubŏn” emi ke otu mmŏ ekutde mme owo ke kpukpru oruk, idut ye usem. “Ōbŏn oro ŏdŏhŏ isuŋ-utom esie ete, Wŏrŏ ke mme ŏkpŏ-usuŋ ye ke mme mben ŏkŏ, nyuŋ yire mmŏ eduk edi, man ufŏk mi ŏyŏhŏ” (Luke 14:23). Utom emi enyene ndika iso tutu akpatre ŋkpŏ-itie ke “udia ndŏ Eyen Erŏn” ŏyŏhŏ.

Idiŏk Mkpasip Ke Otu Ibokpot

Edi nte akwa utom edisuan “eti mkpasip” osuk akade iso, utom eŋwen ke aka iso ŋko ke ekim, “ke ini mme owo edede idap.” Enam nnyin ifiŏk ite ke “idiŏk mkpasip” ke ŋke emi edi nditŏ andidiŏk (Matthew 13:38), ndien “owo usua” emi asuande mmŏ edi andidiŏk (Matthew 13:39). Tŏnŏ ke ini Adam tutu osim emi, Satan ke oyoyom “nditŏ” obio-ubŏn esie. Ndien ke ini Emanas Mfŏn emi enye otim esin ifik ke utom esie akan, koro enye ŏfiŏkde ete ke ini esie edi ibio. Ndien enye akan ke ndinam ediwak owo etiene enye “ke mme owo edede idap,” koro ediwak owo ema ebe eduk ke idap spirit, ndien ke emi ke esaŋa ke “ŋŋwaŋa usuŋ eka nsobo.” Obio-ubŏn Satan eyesŏp ada itie ke ini esisit (Eriyarare 13:1-18), kpa ke ini emi “akwa ukut” edidade itie ke isŏn. Ndien edi itie mme owo ndimek idahaemi, me obio-ubŏn ewe ke edikut mmŏ ke usen oro.

Emanas Mfŏn

Edisuan “eti mkpasip” ye edisuan “idiŏk mkpasip” ke osuk aka iso kpa ke ini edikwŏrŏ “Gospel Ubŏn Abasi emi” osuk akade iso ke ofuri ekondo (Matthew 24:14). Ndien ke ini mbon-utom enyene-ebiet ema ekekut idiŏk mkpasip ke iŋwaŋ, mmŏ edŏhŏ ete, “Ete, nte idighe eti mkpasip eke afo akasuande ke iŋwaŋ fo? Enye asaŋa didie

ndien otibe idiok mkpasip?” Enye odoho mmọ ete, “Owo-usua akanam emi”. Edi mbon-utom ete enye, “Nte amama nnyin ika naña ikatañ mmọ?” Edi enye ete “Baba, mbak ndusuk, ke ini mbufo etañde idiok mkpasip, mbufo edidibere ibokpot ekoro ye mmọ.”

Ndusuk mme andiduñore Nwede Abasi emi ema ekenam isañ ekesim Edisana Obio, enim ete ke “idiok mkpasip” emi edi eto emi ekemede ndibiat uwem, emi enyuñ ekotde nnyanyaña emi midighe mmem-mmem ñkpọ owo ndidiñọ enye ke otu ibokpot ke ini emi mmọ efiaride ikon, edi, edi ata mmem-mmem ñkpọ ndibahare enye ke ini emi mmọ esioñode mfri. Ewak ndikut eto emi nte atarade oyohọ otu ibokpot onyuñ awañade kiet ye eken ke usuñ nte owo mikemeke ndidibede enye mfep ndien etre ndibiat enye eken; emi edi ntak ofonde ndibet tutu osim ini ukpeñe. Ke ntre Abasi onyime ete “ibokpot” ye “idiok mkpasip” ekori otọ kiet, ke ini uwak mfon erinyaña Esie osuk odude; koro ini usuan mkpasip edi emi, nte ekpetiñde, ke ini emi Enye otimde mme owo idem ebeñe Obio-ubon Heaven, kpa ke ufot ukwañ ye idiok ererimbot emi. Ekeme nditre nditim ndiñọ nditọ Obio-ubon ye nditọ ererimbot ke emi, nte edidide ke ini iso, okposuk edi nte ñkpọ etiede ntem, edi mmem-mem ñkpọ owo ndidu uwem nte anditiene-Christ ke mme idiok ini emi. “Koro mfon Abasi ama obiñore edida erinyaña osok kpukpru owo; onyuñ ekpep nnyin ñkpọ, man oto do nnyin idianare ikpon idiok ido ye idiok udon ererimbot, idu uwem ke eti ibuoat ye edinen ido ye ido Abasi **ke eyo emi**” (Titus 2:11, 12). Abasi okokot nnyin ete idisaña ye Enye mi ke ererimbot nte Enoch akanamde ke eset, idianare ke esit ikpon ererimbot, obukidem ye Satan. Ikot emi ke osuk akaka iso ke ererimbot. Ndien “owo eke amade” ekeme ndiyere nnyuñ ñkabare ndi eyen Obio-ubon.

Ini Ukpeñe

Edi usen kiet “ini usuan mkpasip” eyetre, ndien “ibokpot” eyedat enyuñ etañ ebon ke “ubet-udia” Esie. Enyene Ebiet, ke ndikere mbaña “ibokpot” ye “idiok mkpasip” ama odohọ mbon utom Esie ete, “Eyak mmọ mbiba ekori otọ kiet tutu osim ini ukpeñe; ndien ke ini ukpeñe nyenọ mbon ukpeñe uyo, nte, Ebem iso Etañ idiok mkpasip ebop mmọ ke ebek, man efop ke ikañ; edi editañ ibokpot ekenim ke ubet-udia mi.” Qbon anam añaña nte ke “ini ukpeñe” edi akpatre ini eyo emi; ndien “mbon ukpeñe” edi mme angel, ndien “ubet-udia” emi editañde “ibokpot” ekenim, edi Obio-ubon Heaven, emi nditọ Obio-ubon ebetde enyuñ enyenede udon ebaña. Ke usen oro ubierikpe Abasi eyedoro nditọ andidiok ke idem, edi edidi usen idara ye idaresit onọ mmọ emi Qbon akafakde. Koro usen oro eyesiere ye Qbon nditọntak ndi ke ison, idighe aba nte usuhore owo Nazareth edi nte ebierikpe ofuri ekondo.

Ndien ofuri idut ererimbot eyebono ke iso Esie, ndien Enye eyebahare mmọ nte emi ekpeme-eron abaharede eron ye ebot, mme eron ke ubok nnasia Esie ye mme ebot ke ufien. “Ekem Edidem eyedohọ mmọ emi edude ke ubok nnasia, ete, edi, mbufo emi Ete Mi odiñde, edida ubon emi ekonimde enọ mbufo toto ke eritọntak ererimbot” (Matthew 25:34). “Ekem Enye eyedohọ mmọ emi edude ke ubok ufien, ete, Edianare Mi, mbufo emi edide mbon nsobo, ekeduk ke nsinsi ikañ, emi ekonimde enọ Satan ye mme angel esie” (Matthew 25:41).

O, usen oro akpakam osop edi, ini eke idikutde Enye iso ye iso! “Iyarakere kaña iwut se nnyin ididide. Edi nnyin ifiok ite edieke Enye ediwoṛode owut idem nnyin iyebiet Enye, koro nnyin iyekut Enye nte Enye edide” (1 John 3:2). Ke usen oro eyediñọ “ibokpot” ye “idiok-mkpasip.”

“Ndibonke akam nyom

Inem m’ubon ererimbot

Ke idara nyenam utom

Kam yak nsaña y’Afo.”

MME MBUME

1. Anie edi “asuan-mkpasip” ke ñke emi?
2. Nso ke “idiok mkpasip” “ibokpot” ye “inwañ” eda enọ?
3. Ke ewe emana ke mme ñkpọ eke ewetde mi eda itie?
4. Nso idi ntak emi mikekemeke ndidibere idiok mkpasip nsio ke adañaemi ekeikutde nte enye okoride otọ kiet ye ibokpot?
5. Nso idi ntak emi Abasi ayakde idiok-ñkpọ osuk aka iso ke ererimbot, nte ewetde ke Ecclesiastes 8:11? “Ubet Udia” ada onọ nso?
6. “Ini Ukpeñe” ada onọ ewe ini ke ukpeñ-ñkpọ emi?
7. Enam didie idiok mkpasip ye ibokpot ke ini ukpeñe? Ndien nso ke edinam emi ada onọ?
8. Siak itie ke Nwede Abasi emi osonode iboro fo ke mbume emi.
9. Nso ke anam-idiok enyene ndinam ke abaña ediwoṛode ke itie eyen andidiok nnyuñ ñkabare ndi eyen Obio-ubon?
10. Nso utọ uwem ke enye enyene ndidu man enyene Obio-ubon ke usen ukpeñe